

東南紀事

東南紀事卷十

餘姚邵廷采念魯撰 邵武徐 幹小勿校刊

黃斌卿

黃斌卿字明輔

一字虎癡

福建莆田人其先以禦倭功世千戶

父奢死崇明之難又晉世襲崇禎末爲舟山叅將福王時  
陞九江總兵改廣西征蠻將軍未赴唐王卽位擢水陸官  
義兵馬招討總兵官封肅魯伯太子太師賜尙方劍治兵  
舟山王御門親餞鄭鴻逵解玉帶以贈勅書曰一統未全  
卽朕不孝三吳未復卽卿不忠斌卿乞周崔芝自副至舟

山益募丁壯營田故臣遺民南來者皆護導入閩凡北方  
出兵及吳中有建義輒先奏消息一時倚斌卿爲重鎮然  
性貪嗇而崔芝慷慨得士由是二帥不合崔芝去別領水  
師是年八月斌卿敗於崇明以周瑞救還軍奪伯爵會定  
西侯張名振自錢塘歸石浦斌卿與昏爲通表福州及名  
振奉魯王如舟山不納旣又誘擊定海總兵王鳴謙并其  
眾張國柱因是藉言爲鳴謙復仇攻舟山大戰三日夜斌  
卿不勝名振裨將阮進以四舟衝國柱乘濤舉砲所向糜  
碎國柱大敗以身免斌卿得其樓船軍益振阮進者故海

中小盜名振拔領水營斌卿計開進取戰艘數十軍資夥  
萬脫歸閩海名振以故望斌卿魯王次長垣封進蕩胡伯  
與名振並列五等進亦薄斌卿闢大義復與名振合松江  
吳勝兆謀歸以蠟書請援島上斌卿猶豫未決時斌卿已  
晉威魯侯其肅魯伯印故在名振議卽用封勝兆率舟師  
抵崇明爲援值海嘯踴歸勝兆事泄及陳子龍等皆死  
遠近失望其冬寧波諸生華夏使人走舟山約內應斌卿  
不時發事又泄島師泊桃花渡聞寧城舉砲遽退夏等被  
殺收及親黨甬人皆咎斌卿斌卿故無攻取圖徒以嗜利

諸夏約旣返悔其一出愈急計保聚配民年十五以上皆爲鄉兵男子死妻不得守制田卽入官六十無子收其產別給口食內地大戶不敢渡海盡籍其田爲官田合計舟山之田二屬官一屬民并欲收其一如土司法爲不侵不叛之島民而已喜戕賊氣類內無親信初年殺荆本徹是年賀君堯來自溫州利其貲使盜殺之中途名振喪師歸每事侮之又失歡于平西將軍王朝先名振去屯南田朝先屯鹿頸兩人皆恨斌卿以拏帑在舟山未得間戊子秋魯王白沙埕還泊健跳令阮進以百艘叩舟山告乏食斌

卿不應亦不使人詣健跳于是名振進朝先上疏合軍討  
舟山賊卿累敗求救于安昌王恭棟及大學士張肯堂上  
表謝罪又謀和諸營曰彼此王臣無妄動九月二十四日  
會于海上各斂兵待命斌卿部將陸偉朱玖背約出洋進  
謂斌卿遁去遂縱兵大掠斫斌卿投之海中二女皆死王  
始移蹕舟山賞名振等有差

周崔芝

周崔芝字九元福清榕潭人少年讀書不成去爲盜于海  
嘗往來日本以善射名與撒斯瑪王結爲父子日本三十

六島各有王如諸侯其國主曰京王在東京而大將軍主國權撒斯瑪雄諸島首尾大將軍崔芝旣熟日本故在海中無不如意微行至家爲有司跡捕繫獄三年賄吏得解變姓名爲盜如故久之就撫授黃華關把總稽察商船乙酉秋以水軍都督副黃斌卿屯舟山其冬卽遣人入撒斯瑪訴中國喪亂願假一旅以齊之存衛秦之存楚故事望之將軍許諾約明年四月發兵三萬一切戰艦軍資器械自取其國之餘財自長碕島至東京三千餘里馳道橋梁驛遞公館重爲修葺以待中國使臣之至崔芝大喜益備

珠璣玩好物遺叅謀林籥舞爲使期以四月十一日東行  
籥舞將解維斌卿止之曰大司馬余煌書來此吳三桂乞  
師之續也崔芝怒而入閩斌卿奏崔芝多盜火器舟楫南  
來有詔趣還舟山歸斌卿軍實諸鎮皆不平會張肯堂復  
薦崔芝善用海有兵千人船五十餘號乞隸臣麾下自効  
乃加崔芝平海將軍分統水師以趙玉成朱永祐監其軍  
大清兵入福州鄭芝龍將降崔芝泣諫曰崔芝海隅亡命耳無  
所輕重所惜明公二三十年威望一朝墮地爲天下笑請得  
先死公前不忍見公之有此也抽刀欲自刎芝龍起而奪



之丙戌正月魯王次長垣崔芝以兵來會封平魯伯復鎮東海口二城以箚舞及總兵趙牧守海口四月海口陷箚舞牧死之崔芝退保火燒輿更遣義子林臯從安昌王恭棖如日本乞師秋從魯王攻福州張名振阮進等已破黃斌卿迎魯王居舟山崔芝亦引而北與周瑞率樓船三百艘分屯溫州之三盤二將不協王命杭人吳明中往解之明中返益構隙瑞遂南依鄭彩崔芝去北依進崔芝進怨瑞乃會名振擊破彩于沙埕舟山旣陷諸從魯王者多潰散崔芝不知所終

張名振

張名振字侯服□□□人崇禎末爲石浦遊擊從魯王  
戰錢塘加富平將軍命率兵規取海寧不進竟歸石浦因  
黃斌卿拜表福州加捧日將軍後以舟師扈王投斌卿不  
納乃更與斌卿有隙王南入閩次中左所名振留舟山丁  
亥正月自舟山引兵朝王于長垣封定西侯大學士熊汝  
霖等以舟山指崇明當金焦北門之管非名振不可趣還  
舊鎮再出兵援松江值海嘯凶失樓船翰林張煌言御史  
馮京第間道得脫斌卿因其敗侵侮之名振去移軍南田

會鄭彩殺熊汝霖鄭遵謙閩地盡陷名振與阮進共迎王至南田尋復健跳所居王

大清兵圍健跳進率樓船數百至金鼓動天大軍解去九月名振進及鹿頸屯將王朝先會師同討斌卿沈之海中斌卿據舟山凡五年自以福州所授不稟奉王約束既與名振爲兒女婚更懷虞詐故及于難朝先故土司嘗受調立功塞上後從王之仁出海斌卿留之麾下失職鬱鬱自請南徇地至奉化之鹿頸聚兵得數千人請命健跳封平西伯斌卿喜收海盜資其剽掠有王大振者善掠獲番舶數萬

金以餽斌卿未饗逃匿朝先營用危言悚朝先其謀始合  
名振等于是合疏奉魯王居舟山尋周崔芝前議復乞師  
日本遣澄波將軍阮美載普陀山寺慈聖李太后所賜藏  
經爲質卒不定約鄭彩與朱成功爭中左所大敗泊沙埕  
具表舟山請援名振以彩殺汝霖遵謙罪大且欲結歡成  
功遂擊破彩之餘兵庚寅名振襲殺朝先初破斌卿阮進  
收其水師朝先收其步卒獨名振無所得及伐鄭彩朝先  
不會至是名振由南田猝至舟山值朝先散兵居民舍不  
及集手格殺十餘人而死秋

大清兵攻舟山松江張天祿出滌闕金華馬進寶出海門陳錦  
出定海名振南禦進寶使張煌言等斷北洋當天祿北軍  
勢盛名振度不支乃與煌言及英義伯阮駿扈魯王發舟  
山舟泊道頭阮進詣海門求和北軍欲誘之進以數舟脫  
歸值大帥金礪之舟火毬投礪風反轉擊進創甚投水大  
兵刺取之進驍捷稱飛將舟山所恃惟進進死城遂陷大  
學士張肯堂禮部尙書吳鍾巒等皆殉名振以先出得免  
如朱成功營成功居王金門名振別屯崑頭鄭芝龍之北  
也遺書戒成功曰眾不可散城不可攻南有許龍北有名

振汝必圖之及名振至成功不爲禮袒背見赤心報國四  
宇深入膚寸乃呼老將軍下拜與兵二萬承制諸軍期以  
收復南京壬辰九月率大鯨過舟山逼金堂獲逃卒金允  
彥斬之祭死事者將吏皆哭進屯崇明沙破鎮江登金山  
題詩而還癸巳成功以讒撤名振還廈門因煌言及寧靖  
王和解益兵刻期北伐抵洋山颶風失亾勲鎮多潰歸福  
寧名振一軍獨全冬再駐平沙崇明步騎萬餘乘凍涉平  
洋名振欲避其鋒煌言曰此用步地急擊勿失旦王善長  
姚志卓以數百人衝其左煌言統裨將以數百人衝其右

鳥銃火器犯其中塘如矢左右皆深溝騎不可退北師大敗免者止一騎江東響震成功終忌浙人以事執善長殺之甲午春名振再入鎮江觀兵儀真留壁六日五月逼吳淞關獲級四百戰艘三百七十告捷于金門乙未秋成功取舟山十二月廿八日名振卒于軍或云成功酖之先是舟山之陷名振母兄妻奉其父主俱赴火死比復舟山名振縞素入城求母屍行慟旣遇毒遺語煌言曰吾于君母恩俱未報若母屍不獲毋收吾骸起坐擊牀而卒軍中憐之自是浙中建義者皆盡惟煌言以文士科得免東海由

是不直鄭氏

論曰浙海之事以舟山爲終始崔芝之乞師日本名振之  
三抵金焦皆所以存舟山也古之思保江南者必北守淮  
西守襄都成都者必趨祁山爭長安況區區懸島如舟山  
哉崔芝泣阻芝龍最有奇氣惜不得尺寸之柄肝膽無所  
用名振撲斌卿殲鄭彩掩朝先或以爲趨利轉圓挾詐背  
本然事魯王始終一節出入環衛夷險無貳比于酈寄之  
賣友義存君親非阿論也

東南紀事卷十



東南紀事卷十一

餘姚邵廷采念魯撰 邵武徐 幹小勿校刊

鄭芝龍

鄭芝龍字飛黃福建南安

石升巡司

人父紹祖爲泉州庫吏庫

接太守官舍芝龍十歲時戲投石子中知府蔡善繼額捕治見姿容麗秀笑曰孺子貴而封釋之不數年流入海島顏振泉黨中爲盜頗桀黠振泉死代領其眾屢抗官軍會閩游饑芝龍截商民船多得米粟求食者競往投賊眾至數萬天啟七年六月遂犯銅山入中左所然芝龍故與他

盜異常念求撫所過戢麾下禁侵掠放還所獲軍將每戰  
勝追奔輒止兵崇禎元年九月因巡撫熊文燦請降時方  
徵天下兵聚遼東不能討芝龍用撫羈縻之芝龍復入海  
物奇珍賂中貴人及福省達官多爲之言授遊擊將軍流  
寇起中原多事而劉香李魁奇等弄兵橫海外芝龍始皆  
與深好旣假朝命討之俱授首芝龍兵益盛獨有南海之  
利商舶出入諸國者得芝龍符令乃行八閩羣不逞歸之  
後又承詔討紅夷累功陞總兵由是起降將如小諸侯權  
傾督撫矣松山兵敗大學士蔣德璟言於朝欲令芝龍以

海師援遼有言其人庸鄙不可遇大敵而芝龍亦戀閭閻  
行復輦金京師議遂寢芝龍有第三人芝虎鴻逵芝豹芝  
虎勇前與劉香搏戰死而鴻逵亦積勞得總兵福王嗣位  
宿將皆例封芝龍爲南安伯鴻逵爲靖魯伯鴻逵會師京  
口明年奉唐王聿鍵奔福州卒立唐王以乙酉七月爲隆  
武元年論翊戴功晉南安伯爲平魯侯靖魯伯爲靖魯侯  
封芝豹爲澄濟伯未幾復晉平魯侯爲平國公靖魯侯爲  
定國公並掌戎事而封芝龍子森爲忠孝伯賜姓名朱成  
功又有永勝伯鄭彩彩弟聯皆芝龍支族芝龍距泉州五

十里築城安平鎮置第海梢直通卧內積財寶甲兵充實  
其中人物麗盛專務豐殖至是開府福州坐見九卿入不  
扃出不送嘗與大學士黃道周爭班噤諸生劾道周又逐  
左都御史何楷使盜道截其耳朝士噤喑唐王爲壇拜彩  
鴻逵分道發兵芝龍輒辭無餉行數里罷蔣德璟告病去  
道周竟死徽州楊廷麟萬元吉等屢表請駕幸輒卒制於  
芝龍不得出丙戌七月王師下浙江芝龍密遣使請降盡  
撤守關兵師度仙霞芝龍棄唐王保安平唐王陷於汀州  
九月師入泉州芝龍恃撤兵功意得厚賞復猶豫慮以立

王爲罪乃自安平引兵逃入海貝勒令芝龍所親持書招之畧曰所以重將軍爲能立唐藩鎮若不輔立吾安用將軍哉人臣事主苟有可爲必竭其力力盡不勝天則投明而事乘時建功此豪傑事今兩粵未平令鑄閩廣總督印以待吾欲見將軍者欲商地方人才故也芝龍得書大喜決降臨行成功力諫不聽安昌王恭棧吏部尙書張肯堂侍郎朱永佑忠威伯賀君堯武康將軍顧乃德具言不可平海將軍周崔芝泣訴芝龍曰誠惜明公二十年威望一朝墮地貝勒接芝龍大飲三日極歡忽夜半拔營挾與北

去芝龍哀請子弟不肖在海上恐爲患貝勒曰此與爾無  
與亦非吾所慮也芝龍已入朝芝豹奉母居安平而成功  
遂起兵鼓浪嶼鄭彩亦扼廈門鴻逵會攻泉州閩海震動  
大清順治九年成功進圍漳州芝龍恐禍及陰遣親信回閩勸  
成功就撫朝廷冀招成功封芝龍同安侯已知成功果無  
意降遂下同安侯高牆及己亥成功圍南京敗歸辛丑冬  
斬芝龍

鄭成功上

朱成功本姓鄭氏名森字大木平國公芝龍子也其母曰

本女天啟七年生於日本幼讀書爲南安諸生福王時入  
國子監師禮錢謙益唐王立召見奇其狀貌賜國姓及今  
名封忠孝伯貝勒入閩芝龍諭成功降成功不從曰父教  
子忠未聞以貳比行又欲與俱見貝勒叔父定國公鴻逵  
陰令逸去得免遂謀舉兵時諸鄭潰散咸集廈門中左所  
而成功部旅單弱乃往南粵召募其冬永勝伯彩至舟山  
迎魯王次中左兩廣督撫大臣奉桂王嗣位肇慶

大清順治四年成功自南粵回會故臣將吏設高皇帝位矢盟  
恢復以故受唐王封賜姓仍尊隆武年號自稱招討大將

軍罪臣以洪政陳輝爲左右先鋒楊才張進爲親丁領余寬郭新爲左右鎮移軍鼓浪島訓練成功年少有文武畧拔出諸父兄中近遠皆屬心於是魯王改次長垣晉永勝伯彩爲建國公彩弟聯爲定遠侯諸附彩者皆奉魯王惟成功自爲一軍夏成功彩合兵及招討將軍楊耿入海澄援兵至島人卻洪政中流矢死其秋七月鄖西王常湖起兵襲據建寧魯王兵攻福州失利定國公鴻達攻泉州成功引兵會之軍於桃花山提督趙國佐率數百騎衝成功壘張進楊才迎戰鴻達遣林順等夾擊遂抵城下別遣小



師破溜石砲城殺參將鮮應龍軍聲大振所在蠶起泉城外號令不行鄉紳郭必昌子謀內應舉家被戮并繫前閤部黃景昉國佐在城中多殺立威泉民日夜惴息會漳州副將王進救至圍解鴻達入據揭陽冬十月成功從大學士路振飛曾樓議頒明年隆武四年大統曆是年大學士劉中藻起兵福安取福寧州戊子春正月魯王兵取興化三月建寧興化皆破魯王改次沙埕成功取同安以葉翼雲知縣事夏建國公彩殺大學士熊汝霖義興侯鄭遵謙秋八月總督陳錦大軍至同安城陷守將林壯猷邱晉一

軍皆沒葉翼雲死遂屠同安成功募兵於銅山已丑遣施琅楊才柯宸樞康明等攻拔漳浦遂下雲霄鎮抵詔安移屯分水關南岡留宸樞守盤陀嶺王師進攻嶺宸樞死其秋七月張名振阮進迎魯王居健跳所成功遣光祿卿陳士京朝於肇慶始用桂王年號九月名振等討斬黃斌卿魯王移屯舟山遣阮美如日本乞師庚寅春正月桂王自肇慶西奔梧州成功入潮州南洋勦楊廣許隆渡達濠誅張禮勦新墟金田等寨皆平之夏六月進攻蘇利於碣石衛施琅來奔秋八月成功襲取廈門殺鄭聯并其軍張名

振阮進周崔芝擊破鄭彩兵於沙埕彩引餘眾逃南海數  
年軍人星散舟楫損壞成功招之以書喜曰今不歸後無  
期矣遂還廈門卒於家辛卯春成功南次平海閩撫張學  
聖使泉州守將馬得功乘虛襲廈門入之前大學士曾櫻  
自縊死諸紳咸避於浯嶼學聖與漳泉道黃澍登山望島  
孤懸海外汪洋萬頃憮然曰此絕地也脫緩急豈望救乎  
遽引還未數日鴻逵自揭陽來得功欲退不得渡乃好語  
鴻逵曰我不出島必不全且公家在安平內地請熟慮鴻  
逵縱之出四月朔成功還至島得功去已二日大悔恨按

失島罪斬其叔芝筦諸將股慄軍勢復振五月入漳州南溪敗鎮將王邦俊提督楊名高自福州步騎來救迎戰於小盈嶺名高大敗乘勝徇漳浦守將楊世臣陳光策降是年九月陳錦克舟山定西侯張名振奉魯王南奔謀取海壇駐師致書勸成功會師迎駕魯王亦與之書曰余與公宗盟也平居則歌行葦之章際難合賦脊令之什公其無吝偏師拯此同患成功乃令兵科給事中徐孚遠前至魯王行宮面啟永曆見正位粵西宜去監國號王復書叙所以勉從監國意乃使奉迎居王金門如寓公焉名振阮駿

等兵皆屬成功王辰春二月成功進取海澄守將郝文興以城降陳錦來援成功簡精銳待江東橋北錦狃於同安之役意甚輕敵及戰大敗奔回泉州六月成功取詔安南靖平和遂圍漳州兵至二十餘萬同知張箬推官石瑋堅守不下金衢總兵馬晉寶來救成功縱之入城數日出戰而敗復退守陴南軍晝夜百道攻城距漳三十里有鎮門兩山屬岸築斷激水灌城復列柵圍之城中升米銀數兩草木之實俱盡噉弩掘鼠陳錦在鳳凰山爲其下庫成棟所刺以其首奔成功全閩大震漳圍至八閱月中外困隔

浙江固山額真金礪固山大溫都力敖童梅勒章京徐大貴總滿洲烏金超哈兵與提督名高由長泰閒道直抵漳城北成功營城南鳳窠山乘高壓壘王師銳甚爲兩翼擊島人久敝堅城皆無鬪志十月三日解圍退屯古縣合戰崩潰追奔四十餘里積屍布野成功入海澄嬰城守守道周亮工收漳城骸骨七十三萬焚瘞一大穴碑曰同歸所是年秋張名振北師次崇明沙破鎮江登金山江南北戒嚴癸巳夏金礪進攻海澄成功與諸將飲酒敵樓指揮沿海軍夜大將王秀奇郝文興聞空砲發曰師臨城矣令其下

皆用斧令曰敵至而斫有頃師盡銳渡海秀奇等大呼登城斧齊下先登悉填濠礪連夜拔圍去是年西寧王定國自武岡還入廣西圍肇慶新泰侯郝尙久以潮州應定國平南王尙可喜救肇慶定國退靖南王耿繼茂將軍哈哈木急攻潮州尙久以鴻逵前入揭陽有隙至是因郝文興來乞師成功遣陳六御救之竟疑不敢開城納兵九月潮州破六御乃攻鷗汀埧等寨引還定國之在肇慶也以書抵成功請會師成功得書往報師期并上諸將戰助於行在是年張名振復退大軍於崇明之平洋沙西寧王定國

進封晉王八月平國公芝龍遣家僕李德歸閩講撫成功  
繆諾因以休士觀釁故朝命金礦撤兵還浙而封芝龍同  
安侯學士鄭庫納賁詔及海澄公勅印授成功封鴻達奉  
化伯芝豹左都督成功宴使者安平辭以未裂土不受爵  
而遺書總督劉清泰謂數十萬眾按甲待和豈能枵腹欲  
就漳泉興福各屬權宜借餉不待報遽遣官四出清泰密  
諭諸城守斂戢避鄭蝦還言成功三議一先割四府二不  
奉調三不受部撫節制又比高麗不剃頭恐如姜驥金聲  
桓等降後激變芝龍恐其子不受詔復爲書與弟鴻達使



勸之鴻遠復書述大姪在中左弟在白沙兼渠行師所居  
靡定相見尤罕其肯聽弟之言乎芝龍悵然無可奈何甲  
午成功僞設六官改中左所爲思明州以鄧會知州事月  
上魯王豚米及瀘溪寧靖諸宗室禮待鄉紳王忠孝沈佺  
期郭貞一盧若騰華朝薦徐孚遠等軍國大事輒以相諮  
考諸生學秀者入儲賢館是年張名振阮駿再入崇明所  
奪北舟及歸者至五百餘艘別將顧忠至天津邀糧艘百  
餘名振登金山望哭崇禎先帝哀動三軍及議和成功以  
不便勞師遠征使人召還義師多不欲南半引去其後名

振遇毒讖者皆咎成功以故失浙海將士心島上軍以科  
餉爲名縱橫衍蔓上游延建俱有海兵出沒閩撫佟國器  
密疏成功異志恐以撫始終自誤上密勅福省督撫鎮將  
嚴飭守備毋墮彼計其年夏秋晉王定國自廉州出師下  
高州拔高明圍新會廣東震動定國遣使成功請婚且趣  
師十月使輔明侯林察總督南征會晉王攻廣州閩安侯  
周瑞憚不敢進於是西師大敗成功怒欲斬瑞諸將爲請  
杖八十革其職十一月漳州守將以郡城約降成功自思  
明州入海澄夜勒兵諸將未知所向四鼓直抵漳城開門

迎入守將朴世用魏標魏其志知府房星輝知縣周瓊李奇生范進等降泉州諸縣望風潰成功復取同安未幾甘輝攻仙遊縣開地道入之屠掠幾無遺和議遂絕

大清命烏金世子統大軍入閩乙未夏五月成功遣忠振伯洪

旭北鎮陳六御取舟山守將巴臣興舉軍降以六御守舟山洪旭攻台溫召臣興歸思明六月墮安平鎮及漳郡惠安南安同安城撤兵聚思明以貝子將至權清野斂戍也晉王定國復致成功書十二月烏金世子至泉州遣人賁諭至思明招降不納易函稱書以祖太壽洪承疇爲辭成

功依違答之內申三月貝子會泉州水師攻兩島成功遣林順陳澤以砲舟出禦大舟先爲颶風所颺多登而遁十餘人浮至金門斷手斷耳鼻遺之別將攻白沙不克而還六月前衝黃梧以海澄來降封海澄公海澄軍儲多成功使王秀奇統黃梧蘇明同守明兄茂先爲施琅副將琅之得罪也茂實逸之及茂從黃廷黃梧入揭陽失利遂按軍法誅茂并梧戴罪故梧明皆怨成功貝子之入閩也漳泉屬邑皆下惟海澄未復梧明憚秀奇不敢動適秀奇出計事二人遂舉城降時貝子重兵在漳成功議率眾北向以

肄之尅期解纜聞海澄變諸將皆失色成功奮然曰吾欲  
圖大豈以澄邑阻事有不行者斬遂揚帆下閩安鎮省會  
震動督撫出王進於獄使治守具南軍屢攻不利乃城牛  
心塔以陳斌戍之梧封海澄公明母猶在海上召明入京  
爲內大臣梧因獻平海策請發鄭氏塚誅求親黨設五商  
及遷海等事成功用法嚴其下常懼誅禮官陳寶鑰黃開  
泰先後出降

大清輒貴顯之以招島上人島上人多動心然降將亦慕成功  
賚予殊渥第宅供帳與已無異以故郝文興等迄死不貳

是年台州鎮將馬信寧波鎮將張弘德降於成功各予白金五千兩蟒衣玉帶一信母妻各白金五百兩珠冠霞帔一是年晉王定國奉桂王入雲南八月大軍復舟山總制陳六御英義伯阮駿死丁酉春正月晉王定國率兵討孫可望可望來奔三月定國公鴻達卒於金門大軍復閩安鎮島將引還陳斌孤軍守牛心塔不得出遣人招降至福州殺之屠其軍甘輝等還自閩安攻寧德滿將阿克襄赴援恃其驍勇輕進馬蹶裏創步戰爲輝所殺戊戌成功議大舉取南京曰據長江則江南半壁皆吾囊中矣諸將多

言南京道遠城固須數萬人不如近攻完利惟馬信力贊  
乃以黃廷爲前提督洪旭爲兵官鄭泰爲戶官居守思明  
自率中提督甘輝後提督萬禮武衛林勝統領余新虎衛  
左鎮陳魁水陸甲士五萬號十萬舉帆入浙攻陷樂清諸  
縣將進長江次羊山暴風覆舟亡數千人退泊舟山整固  
舟楫以圖再舉桂王遣周金湯由廣東龍門航海至思明  
封成功爲延平王諸將陞擢有差成功以未有恢復功辭  
王爵稱招討大將軍如故是年

大清師入貴州李定國白文選等皆敗己亥五月成功全軍北

出抵崇明以兵部尙書張煌言嘗從定西侯名振三入長江知虛實用爲前驅煌言請定崇沙爲老營不聽金焦沿江置砲島人乘南風盛徑抵瓜洲城下我師出禦死者千餘乘勝克其城以柯平爲同知守瓜洲成功留攻鎮江令煌言先搗觀音門儀真官民迎降六月廿四日鎮江軍陣江口成功登陸擊之戰未合周全斌率所部先登陷陣時大雨瀝騎皆陷於淖海上軍徒跣擊刺往來剽輕我師竟敗提督管效忠走朱操江被執江南北大震成功入城以全斌違令先動將殺之諸將力請乃免於是全斌帶傷守



鎮江七月成功進圍南京移檄遠近張煌言至蕪湖廬鳳  
寧徽池太守令將吏日納款軍門凡得府四州三縣二十  
四金陵守禦雖堅亦欲議降煌言將向江西馳書勸成功  
急攻南京而分兵下旁縣成功因累捷不時發令初至馬  
信卽欲揮兵登城成功不許崇明副將梁化鳳先已降又  
不時調化鳳偵丹陽無備遂引兵突入南京乘南軍怠夜  
開城出大有斬獲次日滿漢軍傾城出戰襲破余新軍諸  
軍皆潰爭赴舟溺死無算成功僅得登舟獲都督甘輝殺  
之成功收潰軍猶數萬人揚帆出海并棄瓜鎮鎮江書生

羅子木抱成功足涕泣請留不聽奉其父以從成功攻崇  
明不克而歸上江軍聞之亦潰煌言跳身間行得達台州  
諸納款者屠戮無遺江右義旅陳九思眾數萬保南饒山  
中聞金陵之敗乃降是年大軍盡取雲南桂王出奔緬李  
定國攻緬迎桂王不克庚子台州守將張承恩書詣張煌  
言請降明安達理出浙海士卒病死大半不戰而歸達素  
兩道指思明大舡出漳州小舡出同安許隆蘇利等皆以  
兵會成功使陳鵬守高崎遏同安鄭泰出浯嶼禦隆利自  
率周全斌陳輝黃庭次海門五月十日旦漳州兵乘風順

流迫海門成功傳令按舟勿動俟大軍齊出乃擊呿吸間  
漳舡已至擊破閩安侯周瑞船瑞與五府陳堯策皆死遂  
攻陳輝船輝舉火藥燒之滿兵躍起且戰且卻近午風作  
潮湧成功親率巨艦衝之鄭泰自浯嶼引舟合擊大軍敗  
橫屍浮海有滿兵二百力戰遣馬信招降乘夜沉之同安  
滿兵向高崎陳鵬約降戒所部無動滿兵恃有內應未及  
岸棄舟爭前鵬部將陳蟒請曰事急矣豈可待死及殿兵  
鎮陳璋齊出大軍皆指言鵬降爭赴之比至戰遂不支蹈  
海死者十七八收鵬凌遲以蟒代之許隆等聞敗引還是

役成功空島出禦相持月餘師不渡海辛丑成功取臺灣  
初紅夷欲城浯嶼依粵灣互市數以巨艦入犯因泊灣築  
二城一曰赤嵌一曰王城餘皆土番立法嚴土番咸奉約  
束歷三十餘年無敢犯者成功積苦海上自南都敗回無  
經畧中土之志又虞廈門單弱謀所向紅夷譯何斌進曰  
公何不取臺灣臺灣沃野千里四通外洋橫絕大海得其  
地足以廣國取其財足以餉兵土番受紅夷凌侮每欲反  
噬久矣以公威臨之如使狼逐羣羊也陳可取狀甚悉是  
年正月成功決意取臺灣諸將謂夾板船多砲火難近鹿

耳門水淺不可渡成功引舟徑進三月次澎湖至鹿耳門  
則水驟漲丈餘舟大小銜尾而渡紅夷驚謂自天而下先  
取赤嵌紅夷走王城死守復燒其夾板舡盡殲之圍至十  
二月紅夷出降生存者僅百數十人縱其歸國乃改臺灣  
爲偽東都王城爲安平鎮赤嵌號天興府以鄭省英爲府  
尹省英關草萊興屯聚犯法者親故不假有諫用法宜稍  
寬者曰子產治鄭孔明治蜀皆以嚴濟事立國之始若先  
尙寬流弊不可勝極矣遂勒諸將移眷時東荒初闢人不  
服水土多死又憚法嚴皆遷延不行於是銅山守將郭義

蔡祿前知思明州薛聯桂同入漳州降義祿將挾忠匡伯張進偕行進曰吾守土有死而已密置火藥署中欲俟二鎮來并焚之二鎮遣人促行遂舉火闔室自焚進在銅威惠頗著人甚惜之冬十月芝龍死燕市芝龍屢以書諭撫否則必見誅僂成功復言設有不幸兒當縞素至是死

大清患閩海久鬪兵從蘇納海議盡遷山東浙江福建廣東濱海居民於內地立邊界著令寸板毋入海粒米毋越疆犯者死連坐春燕來巢於海舟島上食盡各鳥獸散成功又聽周全斌讒使擊忠勇侯陳豹於南灣豹倉卒不能自明

舉軍入廣州降又忽命戶官鄭泰監殺長子錦泰愕恐獲  
罪又叅軍蔡鳴雪自臺灣來思明聲言將盡誅諸將於是  
合謀拒命值全斌從南灣還素與諸將不協恐其爲變誘  
執之主申五月成功死於臺灣成功感風寒月朔受謁尙  
坐胡床諸將不知其病數日卒年三十九成功在軍每善  
處敗素自厲氣戾夫宿將避駭不如及南都挫輒經營  
立國氣頗不振遙傳桂王遇害張煌言每勸成功尊立魯  
王以存明後成功不欲惟奉永曆年號終身錦在思明稱  
嗣封世子發喪鄭襲在臺灣有異志錦自將擊襲與歸思

明又以嫌殺鄭泰泰弟鳴駿及諸宿將皆懼先後北歸靖南王耿繼茂總督李率泰遂大舉攻破思明金門甲辰春三月世子錦退守臺灣

論曰余遊吳淞遇梁化鳳部將管姓者述己亥戰事頗悉其人身在軍中自石灰山轉戰而下聲如崩山然猶按步鼓收兵至後乃大潰延平師有紀律如此化鳳西安人武進士以破姜驥先登立功總兵崇明化鳳亦言當勦敵多矣未有如鄭家之難敗者化鳳始入城固山等以漢兵輕之悉奪其馬驟給滿軍其部卒往往與滿軍譁而爭輒得



鞭縛其部卒自恃其勇不肯下化鳳亦怒以是願決勝一  
示滿軍先一日出城揭死人以投敵固山等坐城樓嘖嘖  
稱嘆由此遂敬化鳳益與交歡旣退鄭軍名其門曰得勝  
門今之東南門是也又言甘輝之死北人咸謂烈士其從  
鄭始末則未詳云

東南紀事卷十一

東南紀事卷十二

餘姚邵廷采僉撰 邵武徐 翰小勿校刊

鄭成功下

大清康熙元年壬寅六月鄭錦入居思明州靖南王耿繼茂總督李率泰遣信史招撫思明思明大臣鄭泰洪旭等議曰先王東征之日猶欲權宜通好今瀕海遷移慘至此極可不爲桑梓計眾意皆合錦下僞教曰先王開國東都草創未半遽爾厭世余將東承遺緒諸君苟能息兵安民無墮先王一生孤忠苦節幸甚泰等乃議照朝鮮例遣楊來嘉

同入京待命朝廷以錦灰燼垂滅不許于江浙閩廣各設  
滿漢兵戶郎中一員專司招輯島上人望風投款多張大  
其事真偽蒙貿文武官降者俱降四級用又有武改文之  
例都督副總改副使僉事參遊改同知其冬十月錦入臺  
灣討鄭襲執以歸初鄭芝龍有子六人長曰森卽成功次  
曰渡三曰恩四曰蔭五曰襲六曰脉恩夫人顏氏出及渡  
蔭脉俱死燕市惟襲在家今年春入臺灣以其生事安置  
之成功歿諸將以錦在遠推襲護理襲謀自立引黃昭蕭  
拱宸爲腹心諸將多不附錦聞知卽引兵東出周全斌爲

五軍以陳永華爲咨議參軍馮錫範爲侍衛十月至臺灣  
昭約諸將出禦皆陽諾會大霧東軍迷後期獨昭先至衝  
錦營錦營多新募戰小卻全斌率親兵數十人力戰昭中  
流矢死俄霧開則日午矣眾驚曰吾君子也並投仗錦入  
安平遣人請襲襲委罪于僕蔡雲雲自縊死收殺李應德  
曹從龍蕭拱宸等數人餘悉不問反側乃安康熙二年癸  
卯正月錦自臺灣還思明以內難旣平祭告先王申固守  
汛六月殺其伯父戶官鄭泰泰弟鳴駿子纘緒來奔泰先  
有與黃昭書昭敗得書及楊來嘉自北還錦疑泰有異謀

泰不自安稱病金門錦率兵將入海澄泰覘知以爲圖已也舉家揚帆出金門有勸泰勒兵入自明者泰泣曰今日救死耳稱兵重吾罪也或又勸之來降曰先王已誤豈容再誤賊舟待命錦使吳慎賚印諭之曰兩島之地一以委伯余棹欲東矣泰猶豫受印未敢入謝鳴駿勸之入錦待泰如舊明日置酒伏甲執泰泰自縊鳴駿大哭曰乃吾殺兄卽引軍踉蹌遁周全斌等追之不及以舡二百兵八千文武官四百人入泉州降封鳴駿爲遵義侯續緒爲募恩伯由是蔡鳴雷陳輝楊富何義先後舉軍降錦勢益衰是

歲魯王昺于金門其世子及寧靖王諸宗室悉避亂奔依  
臺灣十月

大清耿繼茂李率泰大發兵攻兩島出同安令提督馬得功統  
新降將及紅夷出泉州黃梧施琅出海澄錦命周全斌當  
泉州兵十九日遇于金門烏沙泉州船三百紅夷船十四  
全斌以二十舟深入北鯨往來衝擊紅夷砲無一中者餘  
舟望見悉披靡不敢進得功殿後爲全斌所破赴海死眾  
兵遂潰而同安海澄兵大勝直走島中錦見不敵退守銅  
山

大清師墮廈門金門城焚掠而還甲辰正月銅山糧盡周全斌  
黃廷復率所部降親舊多散惟洪旭與陳永華永華兄子  
繩武侍衛左右不去引餘眾東保臺灣僞改東都爲東寧  
僭置天興萬年二州委永華統庶事分土列屯徵租均役  
興魚鹽申法禁立學校通市外國安撫土民然自後鄭氏  
之甲竟不能出東寧閩廣浙瀕海中外殊絕民少安枕矣  
是歲前兵部尙書張煌言移桃花山被襲檻車致杭州不  
屈死之南海悉平明年

大清以施琅爲靖海將軍督水師進攻臺灣周全斌楊富等皆

隸之出外洋颶風大作羣舟漂沒引還未幾琅徵入京撤  
降兵分屯各省嚴戍守界不復以臺灣爲意後四年己酉  
乃復遣明珠蔡毓榮至泉州加興化知府慕天顏卿銜兩  
入臺灣許以如朝鮮封貢錦遣柯平葉亨報使議卒不成  
康熙十二年癸丑靖南王耿精忠懷逆謀內畏太妃周氏  
未發密遣番譯黃鏞使臺灣請兵援錦艤舟澎湖待之冬  
吳三桂反上詔平靖二王留舊封精忠謀益緩乃辭錦旋  
師甲寅春靖南太妃周氏薨反計遂決復遣鏞聘臺灣許  
歸全閩戈船曰王將水吾將陸江浙不足平也三月望日



精忠坐府召督撫以下計事執總督范承謨殺福州知府王之儀巡撫劉秉政請降遂據福州馳檄屬郡自爲總統兵馬上將軍稱甲寅年提督王進功以泉州總兵劉炎以漳浦趙得勝以海澄各舉軍降加進功平北將軍炎寧遠將軍得勝威遠將軍海澄公黃梧已降病疽死封其子芳度爲平和公遣曾養性取福寧畧平陽平陽總兵蔡朝佐降潮州總兵劉進忠密請兵使劉炎會之攻續順公沈瑞并其軍以進忠爲平粵將軍吳三桂至衡州僭僞號國號周紀元昭武夏四月錦遣禮官柯平如福州報聘精忠始

慮下游不服故藉錦聲援已而旬月之間全閩皆下浙之  
溫處江之廣信粵之潮州繼踵風靡意更驕倨乃欲負約  
語柯平曰師來不惡當分地自戰耳由是兩家兵端起矣  
精忠多忌以王進功在閩日久恐其爲變誘留福州徵諸  
鎮兵出關惟興化馬惟興先行黃芳度遣其兄翼率千人  
從復徵趙得勝兵不應以海澄待臺灣錦遣侍衛左都督  
馮錫範督諸軍入思明得勝深交錫範會取同安五月至  
同安守將華尙蘭降泉州守將張學克衆在同安繫之以  
招學克學克聞變趨赴不及遂以軍降施鳳亦率舟師降

下游人心搖動精忠大恐以王進舊將有聲擢爲都尉使  
鎮泉州是月鄭錦入思明以鄭省英知州事敘海澄同安  
功趙得勝爲興明伯張學克爲蕩滌將軍華尙蘭爲神武  
鎮楊威爲尾宿營施鳳亢宿營鄧麟采知同安縣舟航始  
集部伍始成舊人鄉戚咸來問勞而耿精忠閉福州會賊  
稱帝鹵簿警蹕修飾儀衛鑄裕民通寶錢馬九王出仙霞  
爲制府李芝芳所遏不得進疆畧日蹙方與鄭氏構兵如  
兩鼠鬪于穴中識者知東南事大定矣王進至泉州步卒  
僅千人與城守賴玉厚結專行威福任戴國用爲牙爪勒

王進功家屬入福州進功子藩錫與楊青等計曰翁被留  
在省聞福州兵又至吾無噍類矣盍先發六月九日誘王  
國用李尙文入軍門執之遂攻王進進意氣自若走登南  
門競死鬪提標無統帥相持竟日暮進遙望揚帆恐海舶  
夾攻乃夜潰圍得省中援軍整甲徐還惠安守將邀走之  
殺賴玉于市百姓鬻其肉殆盡絞戴國用泉民德李尙文  
爲請乃釋之迎島師入城以藩錫兄弟爲指揮使假理提  
督軍務餘官皆復舊職黃芳度在漳州聞風欲降念其父  
罪重懼不免死錦使告之曰時際光復事屬爾父果抒誠

惻當棄前愆乃殺城守劉豹奉啟泉州承制封德化公前  
提督有請靡不從芳度終不安間道密表于朝錦亦羈縻  
之漳屬皆下獨漳浦爲劉炎所據于是鄭氏據有漳泉二  
州及思明金門平南兵圍劉進忠于潮州潮福路斷進忠  
由海道獻欵思明錦使後鎮金漢臣舟師援之以進忠爲  
定北伯兼右提督秋七月精忠兩遣使至思明行和求泉  
州九月遣王進自興化別將由上游會劉炎協攻泉錦使  
右武衛劉國軒出禦進素輕南兵泉州之役曰是眾寡不  
當願益兵期取泉自効步騎二萬鼓行至惠安恣焚掠國

軒嚴陣以待相守越旬進退屯楓亭連營二十餘里軍勢甚盛國軒率輕騎覘之猝遇于塗嶺許耀少卻國軒分諸軍搏戰自辰至巳兩軍殊死鬪進兵遂潰追奔至興化軍郭外三日夜乃還十一月錦以劉炎在漳浦爲右臂患遣興明伯趙得勝侍衛馮錫範由海澄進師炎與雲霄鎮劉成龍福州親軍都尉徐鴻弼合師迎戰于羅山嶺右虎衛何祐揮兵擊之炎等大敗走入漳浦城島師環陣攻圍三將皆出降遂引兵西救潮州先是金漢臣救潮州一軍盡沒會耿鄭禍結外援不至城壞百餘丈劉進忠悉力守禦

中外隔絕已半載至是趙得勝統軍入潮與廣兵戰于黃岡破之廣兵燒營而遁潮圍始解得勝班師先是三桂初反遣帛書一入福州一入臺灣會兵錦使監紀推官陳克岐副將陳文煥報之三桂復遣禮曹員外錢黯通問值島師入泉再遣禮曹周文驥來解兵曰天下事重無操同室戈貽敵笑及精忠聞鴻弼等敗乃使潘曰興修好錦報曰耿王能如約者聽竟未決鄭氏自成功時卽置六官多僭帝制錦再出思明更多設僞官以陳永華爲御史總制留守臺灣以六官協理洪旭子洪磊吏官楊榮戶官鄭斌禮

官柯平刑官楊賢工官惟不設兵官置六科都事察言承  
宣賓客諸司親軍曰侍衛以馮錫範爲之曰勇衛留守永  
華攝之曰左右武衛薛進思劉國軒爲之曰虎衛何祐許  
燿爲之曰五衛施福爲之曰鑾儀艾禎祥爲之又果毅  
折衝五常五行五兵左右先鋒前鋒後勁中權戎旗二十  
八宿營制聽五提督節調凡文武事宜皆贊畫參軍陳繩  
武侍衛錫範主之前取餉于東寧比得漳泉轉運不繼始  
用六官徵催富民紳士以鄭省英爲宣慰使統督各郡錢  
糧前昌密道吳愼爲屯田道清收屯租諸縣令以六科都



事爲之皆臺灣來者人月輸銀五分名曰毛丁船計丈尺名曰樑頭督造採船料鹽司分筦鹽場以陳達章司泉州馮錫圭司漳州鄭珍英司潮州鹽石直二錢徵餉四錢餉司科雜稅給軍康熙十四年乙卯春正月精忠遣張文韜如泉州賀年以五艘如約遣鄭斌報使立條誓楓亭爲界自是耿鄭交好二月錦殺永春民呂花花恃馬跳地險不服徵索避科歛者依之錦使左武衛薛進思攻圍三月不下永春知縣鄭時英遣人招諭許以不死花出降釘之沒其家產是月續順公沈瑞以饒平降臺灣瑞叔母尙氏平

南王女也降耿時遷至漳浦瑞尚留詔安廣兵圍潮瑞趨饒平及潮州圍解劉進忠移師攻之不克廣兵來援左虎衛何祐遇于百子橋敗廣兵瑞乃降改封懷安侯五月錦率師次于海澄饒平之捷劉進忠密啟于錦請討黃芳度錦亦以黃氏必死之寇終無降理是月六日發泉州入海澄實圖漳州留駐二十日芳度不敢入見遣其中軍朱武奉啟意覘軍勢錦使鄭斌入漳宣慰或率兵從征或束身自詣終不至且召黃翼于關外密使歸漳耿移書來徵又以病辭遂定計攻城是月劉國軒大敗廣兵於鸞母山國

軒自塗嶺之役率所部入潮同劉進忠行徇屬縣諸縣堅  
守國軒兵老糧乏欲退守潮州後圖平南揮步騎來追國  
軒及何祐等設伏以待會吏官洪磊宣慰廣東厚貲增募  
驍勇迎戰蠻母山伏發廣兵大敗六月黃芳度據漳歸朝  
錦自海澄移軍萬松關芳度剃髮守陴使弟芳泰入廣告  
急賴陞守平和爲之聲援島人攻漳城不克後鎮萬宏申  
砲死何祐自潮州攻平和賴陞降漳屬皆復爲臺灣芳度  
孤守漳城是歲番舶互市于思明先是中左所爲諸洋利  
藪島破夷舶不至甲寅鄭氏復島英圭黎萬暹羅安南諸

國皆獻方物互市中左煙火市里幾復其舊康熙十五年  
丙辰

大清兵入福州耿精忠出降王師進克泉州黃芳度以漳州兵  
來會劉國軒復來爭泉州攻圍兩月不下芳度遣兵復平  
和屢攻黃瑞鑣于漳平不克七月將軍喇哈達師次漳平  
瑞鑣無援始出降喇哈達間道永安援泉州湖頭李光地  
練鄉兵自守爲鄉導巡撫吳興祚自仙遊復永春提督楊  
捷自興化下惠安林賢黃鎬陳子威以舟師出閩安鎮剋  
期救泉州國軒水陸布禦恐分兵力薄乃引退趨長泰諸

縣皆棄還林賢等進復定海島將章元勛戰死蕭琛退泊  
海山錦召琛還斬以徇遣左鎮陳諒後鎮陳起明督朱天  
貴等禦林賢九月

大清師敗劉國軒于漳州之溪西國軒自泉退師墮同安城進  
兵溪西滿漢盡銳迎戰至午國軒步卒饑乏鐵騎橫衝首  
尾不相顧遂棄長泰出江東扼守三叉河玉洲水頭鎮門  
王師軍壘相望督造江東橋冬十月督撫遣漳州進士張  
雄如思明議和時漳泉郡縣皆復獨海澄未下度島人必  
爭難猝攻乃爲公書以生民塗炭勸令息兵歸臺灣如先

王時雄還又遣泉紳黃志美入議約必得海澄始可成好  
錦不聽康熙十六年丁巳春

大清師攻救海澄錦復破之遂圍泉州錦下僞教叙諸將功以  
申提督劉國軒爲武平伯征遠將軍後提督吳淑爲平遠  
伯寧北將軍左虎衛何祐爲左武衛前虎衛林陞爲右武  
衛右虎衛江勝爲左虎衛俱授左都督餘鎮營各加級有  
差某月

大清師克復海澄擊破鄭錦兵於泉州錦撤兵還思明閩地悉  
定十二月詔復遷各省沿海人民於內地置戍禁出入甲

寅之亂閩省遷民悉還故地至是閩平復議遷界康親王疏稱遷界累民請罷之已報可後島人就掠內地督撫提鎮請仍從順治十八年例遷值破海澄圍泉州事暫停及泉州解遂行遷界之令益不聊生唯廣東尙王力請不遷得已康熙十八年己未春正月詔築沿邊界寨自福寧及詔安率一二十里置寨量地險要截內外濱海數千里無復人煙二月鄭錦復取海澄以張廷輝知縣事劉國軒使吳淑率諸軍據果塘寨廿九日大軍敗於定海是日旦朱天貴陳諒自海壇乘南風進泊定海北舟大小百餘艘由

五虎門銜尾而進天貴與陳啟明率煩船先登啟明船遭  
風失舵還泊海山三月鄭錦旌思明義輸寡婦辛氏兩島  
地狹數戰征輸繁重丁巳之役州民人月輸米一斗至是  
月輸米三斗不堪命中提督劉國軒辭月俸自餉轄兵三  
月吳淑何祐等皆效之水師五鎮蔡仲璘守惠安駕小舸  
逃入泉州投巡撫吳興祚降漳州守備呂韜降於臺灣韜  
守江東橋敗歸劉國軒進軍海澄陰以漳郡通款事泄羈  
候將入省待理韜遣人要英毅鎮林彪請援行至同安界  
彪伏兵取之以歸以爲折衝左鎮移其家入臺灣初蔡寅



詭稱三太子起兵耿逆故將紀朝佐同安武生鄭奇勲從  
之後同歸臺灣未幾寅死二人請再舉入山召募爲大軍  
所困不能出詣總督姚啟聖降鄭氏南北汛防多以缺船  
饟爲辭徵調不至於是上及普陀下及廣東平海大蓬皆  
遣官監紀歸鹵獲婦女室民夏四月鄭氏以長子克塽居  
守臺灣總制陳永華言克塽長成蒞事明達請循君行則  
守之典立爲監國錦從之時年十六僞號監國世孫六月  
以屯田道鄭時英監理鹽法駐東石

大清師築靈水寨以逼東石右武衛楊忠率兵趨潯尾南北塲

掘鹽埕貪利舍舟開至深滬閱兩日夜泉州大軍侵晨驟  
擊忠殊死禦不敵中砲沒於海秋七月鄭氏築潯尾寨潯  
尾在同安咫尺直廈門高碇癸卯之役

大清師從此過島劉國軒請築寨其地一夜成之同安出兵爭  
不得築石城一土城一復築兩洲城八月水師提督萬正  
色至福州初施琅督水師琅徵入京官亦裁丁巳冬以海  
澄公黃芳世兼水師提督及灣腰樹戰敗病死督撫請琅  
復任朝廷不許擢鎮江將軍伯王之鼎以嘗任漳浦知閩  
事也之鼎入閩屢疏不諳水戰更授四川提督以正色代

之正色泉州晉江人頂投誠銜劄累陞岳州總兵及湖南平乃有是命初漳浦江機與楊一豹結約聚兵江右耿精忠以爲左軍都督耿敗置壘江西浙閩交界據深險時出酷掠江西制府董衛國屢遣兵討之不克走歛臺灣授征夷將軍機跋號江拐子浙江制府李之芳懸重募解散其黨機引餘衆奔閩中建寧城守劉起龍禦之陣傷而死九月大軍取東石寨丁巳春鄭氏使右武衛林陞守東石明年移陞攻海澄以楊忠代之及大軍設兵防界又欲築靈水寨忠懼兵單難守請檄陞回汎忠死陞復出征以施廷

陳申守之纔餘疲卒二百精銳皆挑以行有降人人泉言  
東石空虛可取狀發滿步數千以廿六日平明填濠四面  
環攻廷被創申力戰死遂奪東石增築三寨於是鄭氏失  
險讓守思明調州中鄉兵團練州經殘破新復入籍甫千  
許以康熊吳桂統之桂北人歸鄭爲亢宿營故守同安思  
明丁巳之役桂獨斂兵完島授建威中鎮以姻親陳愷叛  
引嫌辭兵歸其子箕宿營吳天祿至是復起授協理五軍  
與總監營康熊分督州兵北人畏劉國軒如虎兩軍相持  
閱歲互殺傷大軍十萬國軒纔萬人營壘咫尺指揮自如

國軒以果堂地要夜于其後版尾加築一寨督撫提鎮將  
軍率滿漢數萬爭之國軒吳淑以二千人依寨進且戰且  
守害章京巴石免等十一月臺灣後提督平遠伯吳淑卒  
于營淑前戰創甚版尾新築諸衛鎮畏不敢守淑毅然請  
自守之大軍築壘環攻砲日夜不絕淑神氣自若會霖雨  
墻壞淑揮左右使避自據胡床寢竟壓死屍至思明錦親  
臨哭盡哀以其子天驄爲建威右鎮統其兵是年詔封賀  
蘭國王請夾板船圖思明初紅毛失臺灣常思恢復癸卯  
間李率泰使人招撫紅毛許以先平兩島後取臺灣歸之

紅毛喜自備舟仗糧肉助戰且請于廈門互市率泰爲後防不許第令數年一貢至是總督姚啟聖請如癸卯借紅毛合攻事例報可乃遣知府劉仔偕通事林奇逢黃鏞等往封賀蘭并請夾板船會攻十二月鄭氏遣右武衛林陞督舟師出思明時福州造戰艦四百餘艘會江浙舡各一百潮州碣石船一百尅期大舉鄭氏悉發官私及洋艘砲船以陞爲總督江勝朱天貴爲副總督配兵北上先是耿精忠之變漳南道陳啟泰密啟陳耿陰事於范承謨後耿搜得書啟泰懼禍殺其家屬十餘人而自縊鄭氏入漳葬

之丁巳大軍復漳啟泰子汝器將入城負骸回京爲東石  
守將所獲羈臺灣贖以萬金乃始得歸鄭氏之貪利失大  
體多類此辛酉壬戌總督啟聖巡撫興祚會提督琅正色  
攻克廈門中左所鄭錦退守臺灣復進兵攻之錦卒癸亥  
錦子克塽奉表以臺灣降前四日寧靖王術桂謂宮眷曰  
此地已破更無他往吾以身殉若等可自爲計夫人袁氏  
王氏及侍姬三皆對曰願從死請予尺帛冠笄先綰王具  
含殮明日五棺出葬于郡南山校隸扶櫬至王翼善冠衣  
袞腰玉繫綬以寧靖王寶持付克塽拜辭天地祖宗郡人

士無幼老皆入拜王答拜乃登帛自絕面無變容諸宗室  
隨克塽內遷詔存先代後給屯田種牛占籍河南魯王世  
子得許州術桂無子繼益王後宗位于儼鈐年七歲屯杞  
縣術桂死年六十有六與元妃羅氏合葬竹滬

### 鄭鴻達

鄭鴻達字高儀芝龍親弟以崇禎三年武舉隸天津巡撫  
鄭宗周爲坐營轉屬都督孫應龍登州反應龍失機從繫  
天津獄已辨釋隸大同巡撫張廷拱麾下用兄芝龍平紅  
夷功得錦衣衛掌印千戶復與計偕十四年庚辰成進士



故事勲衛射策武甲科加三級進都指揮使十六年授副  
總兵設南贛兵三千以鴻達統之十七年正月前兵科都  
給事中曾應麟薦鴻達緩急可用詔益南贛兵二千配鴻  
達鎮守福王嗣位南都檄守采石以左軍都督領水師挂  
鎮海將軍印封靖魯伯邂逅唐王聿鍵京口心相善及南  
都敗退走又遇王錢塘江干奉之入閩以王賢明可繼大  
業遂與兄芝龍及巡撫張肯堂等戴王建號爵鴻達侯尋  
晉定國公時八閩由鄭氏鴻達不以家勢陵耀同列然性  
雅懦不能與芝龍立同異唐王築壇具殊禮命與永勝伯

彩督師分道出關竟不進芝龍亦不發饗乃黜鴻逵爵彩  
數敗退又好掠時議多罪彩頗恕鴻逵大軍度仙霞芝龍  
竟賣關且招子成功同北行鴻逵陰逸之成功建義鴻逵  
有力焉

大清順治四年八月會成功攻泉州已引兵西據揭陽明年還  
廈門會馬得功襲破廈門鴻逵軍適至得功不得退以好  
語來說鴻逵因縱之居二日成功自平海還按失島罪斬  
守將叔芝筦鴻逵愧謝退居白沙築寨名曰華角芝龍京  
師屢寓書使勸成功歸朝否者家屬見屠鴻逵復以養病

退閒無與人事大姪意堅勸之無益爲說鴻逵有足疾修  
園亭種花木高吟度曲品笙自娛丙申貝子入泉州別將  
攻白沙鴻逵移榻金門明年三月十六日病甚卒年四十  
五子耀基亦隆武賜姓時稱成功國姓而耀基爲小國姓  
死臺灣芝罘子省英爲僞天興尹